

四庫全書

集部

欽定四庫全書

集部

懷麓堂集卷五十一至五

詳校官監察御史_臣范衷

中書_臣劉源溥覆勘

總校官編修_臣王燕緒

校對官待詔_臣胡士震

謄錄監生_臣劉澐

欽定四庫全書

懷麓堂集卷五十一

明 李東陽 撰

詩後稿一

古樂府

靳克道少卿所藏杜愚男朝母乳姑二圖請題
其上為賦古樂府二首

下帷哭穆伯上堂訓文伯不聞民勞逸先問土肥瘠后

可織母可績爾食爾祿我服我力保我家祀成爾德朝
朝朝母得母憐一朝責子令子賢文伯賢穆伯祀敬姜
之名名不死靳家此母復此子杜郎作圖如作史

右朝母篇

母乳兒兒無齒尚可飴婦乳姑姑無齒亦可哺兒本姑
所生一氣通吸呼水有報本獼林有返哺鳥人可以不
如鳥乎靳姑老生覲朝笋暮復魚十年乳姑意理一事
則殊母有兒姑有婦昔見崔山南今聞靳京口

右乳姑曲

猫相乳行

監察御史四明陸君美之仲兄文亨素友義與
君美少相依文亨每同堂而食撫其諸子恩義
薦至而外無間言嘗各畜一猫猫各產三子皆
銜至堂中乳之每一猫出一猫必為代乳若一
無間然者人以為友愛所感君美既貴感其兄
之義請記其事於予予非韓昌黎氏無能為說因

為樂府作相乳行俾其鄉之人歌之以傳於無窮
猶相乳據如許但知母子恩不復我與汝猶相乳世希
有但食乳哺甘不知誰是母陸家兄弟本同胞提孩挈
稚相為勞和氣感動成薰陶吁嗟乎人生胡不如此猶
示用兒效玉川子作

夜坐苦不樂作詩示用兒用兒爾何來來自東南陞自
言廣西人州縣已忘遺但知姓李氏世業本巫醫家有
三頭牛有田可耘耔當年貴州蠻作亂勞王師夜間狼

兵到勢若虎與貔我爺被殺死血肉交淋漓我娘亦被
賊存亡未可期官師簡少俊閹割隨俘纍用兒年十三
廣額身尪羸生來左目翳幸免殘膚肌紅船載白粳驛
遞來京畿兵曹奏名籍給配在有司臣愚本無功恩與
公侯齊用兒亦何物御筆蒙親批彤廷頓首謝髻髻歸
提攜煮羹為女食縫帛為女衣役不忍汝勞過不忍汝
笞居遣用兒侍行令用兒隨殷勤語子姪慎勿凌虐為
丁寧戒僮僕疾病相扶持緬想先皇德欲報何能追賜

生尚必畜況此非豚雞今皇兩僮賜本出思恩夷岑梁
年十一吳也二歲差渠視汝為兄汝可弟視之班行若
鴻雁戲弄吹塤箎渠小不足責汝長教所宜用兒爾來
前訓女好言詞清晨早必起日暮眠當遲操畚掃廳堂
汲水澆園畦客來倖茶菓客去收書棋有口莫吃酒酒
醉死路岐有手莫做賊做賊送頭皮人生無貴賤但問
所從誰長為官人奴勝作撞與黎用兒爾誠駢告汝汝
不知垂頭睡莫對吾自吟吾詩

慈母圖 孟氏

將上堂聲必揚夫戒雖嚴不如母訓長惟禮有經家有
綱惟母所愛情可忘生不逮父義有方君不見斷機之
教何其剛

孝子圖

大兒視母如視父兒罪當答母當恕小兒視母如視兄
往復轉轉難為情卧層冰得雙鯉兒身雖勞母心喜亦
知慈孝同一理惟人有心天有耳君不見大兒官貴為

三公小兒脣嗣傳江東兩兒為劇戲滿堂坐客皆垂淚
長短句

鐵拄杖行

國初廬陵諸老好奇者持鐵拄杖採詩林谷麟
原王子讓先生蓋其儔也我希遠府君時以流
寓還往其間子讓諸孫雲南按察副使世賞能
道其事因託物寄興以著通家之義云

江西水中一枝鐵磨光成精錯成節江頭詞客採詩還

拄徧淡雲與山月吾宗遺老詩家流杖藜來自湖南州
道逢此物兩叩擊鏗金憂玉聲相酬鐵精化龍入江去
回首溪山但烟霧文章逸史見諸孫指點當年採詩處
杖兮杖兮物雖去矣名猶存青毡豈獨王家門願君節
比杖兮心比鐵善保六尺千金身

靈壽杖歌

吾聞武當之山四萬一千丈半在天根半在上不知三
十六宮何處稱絕奇產出靈株非一狀蛟螭蟠拏露頭

角熊經樹顛虎山脚根盤節錯相糾纏含風飽雪經炎
寒九年洪水之水浸不殺十日之日暴烈何其乾梯懸
磴接跬步不可上誰采青壁紅琅玕見之羨者不容口
錫以嘉名曰靈壽爪之不行者有聲金可同堅石同
久吾家此物舊所有神與相扶鬼為守自從病足跛
曳不得前已覺山林落吾手一病經旬不出門此杖
手中嗟猶存下牀歌側立不定此時託子以為命不願
四體無微疴但願謝病歸山阿左扶右策夾以二童子

下可涉園徑上可凌坡陀願載萬木截萬杖窮崔陰谷
生森羅靈兮壽兮此物倘可致宜遣四海赤子頭雙皤

華山圖歌為喬太常寺作

嗟哉此山吾不知其幾千丈兮但見巍然屹立乎天中
中有三峯聳拔而直上部位離立西南東諸峯羅列在
其下有似老長隨兒童縱令立表以識不得筭雖有記
里之鼓難為功我聞上古之世開鴻濛沙木盪汨相結
融融者為泥滓結者為石為山峯石堅山積理亦爾試

看崛拔斬削別有造化之神工山名五嶽此其一特出
似異衡與嵩天門重重隔烟霧鐵鎖緣崖引長路摳衣
欲進苦不前十步行時九回顧山腰流泉如瀑布仙掌
撐空若承露虎踞龍蟠各有形鸞騫鶴舞紛無數置身
中峯頂極目乾坤莽迴互秦關蜀徼阨塞豈足論遙指
扶桑最高樹噫吁噫自有天地今即有此山萬物代謝
兮山巋然古人今人到者相接踵誰復騁步窮其巔我
生好古厭塵俗險絕獨慕昌黎韓昔年南遊復東眺二

嶽咫尺不一攀有客西來詫我以大觀歌聲上徹秦雲
端畫圖指點向空廓已覺天上非人間喬生喬生如此
好奇者世不可以多得安得與子遍歷千巔岼

寄題惠山第二泉

江神夜泣山林嘯帝遣神工鑿山竅飛流出地聲灑空
泉水下與中泠通江邊老弱不知姓手著茶經親鑒定
金山之外更無泉坐令匡廬瀑布空高懸地官侍郎寶

國心似水平生品泉如品士

國賢在許州嘗作品士亭

似云江水不

同清此山自得青金精

世傳泉以錫故清

尋山浚泉發清瀉元

是江南好奇者山高水絕詩亦奇鳴金噴玉無停時我
山曾過泉不酌夢枕峻嶒激瀼瀼我歌泉和兩知音吁

乎誰哉更識泉齋心

國賢嘗號泉齋

懷麓堂集卷五十一

欽定四庫全書

懷麓堂集卷五十二

明 李東陽 撰

詩後稿二

五言古詩

尼山春曉圖

濛濛尼山雲忽忽天向曉
依微遠峯露拖沓層城繞
每日山漸高浮光動林表
環看萬家村俯視一飛鳥
上公圭裳胃興

與巖谷香丹青得形似指點入幽渺回首岱宗巔誰云衆山小
習隱二十首

卜築城西廬寒暑十五更西軒開新圃遠若居荆衡疎
林見秋色爽籟聞空庭園蕪綠復遍屐印旋已平習隱
漸成癖誰當戀冠纓靜言念疇昔鬢髮白幾莖素忠豈
不高隨時且功名退公得委蛇聊以娛我情

又

野色澹蕭條城居類林壑閉戶掃荒徑秋葉紛欲落園

亭雜花晚紅碧相間錯
米芳意未遲及此霜露薄
陶韋去世遠古調方寂寞
撫景非少年悠然念今昨

又

岸幘斜陽下疎林開遠山
新涼灑衣袂爽氣清容顏
林端見初月素彩生雲間
褰裳步花影欲動悲闌珊
向來竹林遊覽到已復還
寧知一畝內迴若離市闌
往事勿重道茲盟良亦難
浮生且為樂及此一日閒

又

伊啞復伊啞隔牆聞水車車翻水汨汨如在東陵家當軒理
嘉樹傍檻移新花一澆潤枯槁再濯無塵沙濟川恐無用學
圃良非差房山有南畝海子餘西涯安得謝簪纓悠悠送年華

又

坐久羣動息秋蟲亦不鳴開軒向空碧華月來前楹炎
歎颺已盡涼氣飄衿纓萬慮逐霧釋虛懷隨白生可與
語者誰心口兩無聲古道日荒落浮雲非我情何當脫
塵鞅及此筋力輕著書畢歲月敢為後世名

又

羣芳應候歇衆鳥知時歸物理固如此消息乘化機
林下無一人反遭釋子譏多言亦安用志士決振衣振衣
果何時我髮半未絲無為大自恕今是昨已非山林在
城市豈必嚴陵磯習隱須及今不習終成違

又

白日到南陸陰盡陽始生古人重茲候閉關旅不行
登臺望朝雲窺管占昏星此事久寒落但知物枯榮
端居默無語俯仰獨含情

又

曉起徧庭白夜來聞雪聲疎林綴冰葉千樹開羣英玲
瓏透遠日拍塞阻間行如登梁園臺對客停飛觥如經
山陰道訪友隨揚鈴居然城市間此景何從生退公日
已暝酒罷還復醒呼童煮雪水坐歌詩脾清慎勿掃我
雪留以待書燈燈前少年事老夫難為情

又

一白雪在地再白雪滿枝三白遍林園跬步天路岐虛

明徹九宇萬類無一錙棲鳥半隱見毛羽振始知空齋
閉燈火習靜仍深思邊兵與溝瘠焉能免寒饑吾曹肉
食人飽煖終安裨今晨尚未隱夙夜將何為

又

種松盆罌內慮為寒所侵移之南廊下幸得辟幽陰寒
多日色淺弱植恐難任再移入我室我室隘復深風沙
信飄灑霜雪徒蕭森不隨歲時改貞哉君子心西簷有
薔薇荊棘忽成林曉歌結交行擇友方自今

又

初陽動浮景嘉木意已榮幽禽失所性入耳皆春聲
踏青者何人似與韶華爭吾心豈外慕聊以盡吾心
池波欲蕩漾野馬將遊行端居不出戶遂我觀物情

又

人皆賀新歲我獨翫芳景茫茫堪輿間此意欣自領
天機在鳶魚下上方耿耿

又

崇桃出牆東，穠李忽在眼。桃李亦何言，下有人跡滿。借問跡為誰，主人雙屐短。門無車馬至，客去春不管。呼酒酹花神，花煩為一筦。賓主各忘言，歸期一何緩。

又

芳園景色動春意，回枯發旭日。半浮空和風，自東來幽學。新弄天籟自相諧，點也當此時。游歌沂水涯，而我獨何人不樂。奚為哉，古來樂天意，每與憂世偕。優悠無已盡，及我鬢未衰。

又

南湖春草綠西涯春水多年光日往再歸興其如何春歸客未歸
微官一行窩舊室幾易主遠道生重波未諧卜居願且和滄浪歌

又

夏日背屋角良久出林杪紅稠綠復暗頓覺炎蒸少長
空無停雲遙岫有歸鳥公餘脫冠坐暫謝紅塵擾跡類
居深山心同楔清沼多謝襴襪郎長年送昏曉

又

流連遲疎雨簌簌鳴高樹隨風散長空往復不知處沾衣覺微涼

歌枕達清曙閒餘惜花意滑憶登山路農事方苦忙傾心且如注

又

暑雨忽新霽層軒開碧山浮雲避素月夜色明松關流螢遞隱見
宛在深林間掃石坐彈絲天風下鳴環瓊樓正在望佇立難為攀

又

直廬日何長退食良亦久斜陽下庭樹暝色稍侵牖樓
鴉尚飛翻鳴虫更清瀏市遠不聞喧樓高但翹首誰云
官事劇餘暇且杯酒試探買山貲囊中猶在否寒多怨

無衣入夏翻苦熱耕夫困田畝行子愁道喝

又

亦有窮邊兵被甲如炙鐵如飛無藏林如走不得穴物
類且復然人生安用說吾徒幸安居公事有作輟揮竹
引虛涼浮瓜嚼殘雪溪行或林卧若與塵務絕吟長素
月生坐久青烟滅願叫閭闔風西來掃炎孽願為萬間厦
意與杜陵別四時有定序寒暑非濫設老我功未成優
游更時節

送青谿先生之南京吏部四首

昔我青雲交登朝半公輔倪君廊廟姿獨立自藻斧鍾
鏞在東序法製形貌古扣之聲鏗然鯨海入吞吐蘭苕
與翡翠信美安足數緬維有司良拔十思得五如君能幾人吾
儕愧參伍南曹固云重瑕亦詎其所願持五色線留為山龍補

又

故都佳麗地舊里詩書門文僖有家學歷世乃彌敦登堂學
士貴踐斗尚書尊簪纓父子繼姓字兒童論文章兩京賦雨

露三朝恩君今歷南省祿養懷晨昏壯哉顯揚志古道諒斯存

又

與君析經史歷代窮興衰與君論世故指物分妍媸君
子固絕識開口無停辭啟我茅塞胸植我蓬生姿中歲
各任事匪徒坐談為君言信實用一一如著龜嗟予溢
密勿獻替真隨時徒懷朴忠志飽食竟何俾茲辰別良
友失我坐右規修途自餘軼逸駕疇能追

又

我昔遊南都山川愛清淑中年有遐慕願此託微祿茲
謀兩不遂歲月同轉轂獵心老猶存龜笑安可卜君行
果登仙脫屣塵外躅俯仰樊籠間吾身尚羈束登高一
相送為駐千里目

弘治乙未六月孔廟災送李學士世賢奉詔祭
告兼東衍聖公兄弟

素王富道德闕里昭儀型門牆揭日月象設開丹青秩
祀宗百代櫟題闕千齡明時累修葺彩筆輝晶熒鬱攸從

何來歛忽乘高寔蒼黃失殿宇迢遞連楹庭冕旒中興
像篆刻先朝銘遺文就剝落餘燼隨飄零尤憐手植檜
摧折虬龍形茲事昔未有流傳駭觀聽我皇眷東顧宵
衣坐明廷儒臣輟講讀天語傳丁寧長路決旬朔嘉期
過秋丁設位想顏色升階慰神靈染盛備時物薦此明
德馨兩公哭三日據禮遵麟經往恨憶焦爛新恩濯清
泠勞君向公言輶車駐晨星金絲闕雅樂俎豆存古劍
此物幸不泯瞻依尚模型聖道一逝川晝夜無時停況

聞庀工作卜日占堯堂增高若為山去災如脫腥君當
返嚴命公當謝丹局從此振文運休風播重溟

答楊太常止酒用陶韻

止酒固佳事但恐不能止劉伶與婦祝竟落談叢裏賦
詩以為警多事柴桑子一止一起之可憤還可喜止終
有起時不止何由起痛絕非人情三分亦近理君誠得
止法能以人視已往辱書戒予此意誠厚矣君量本十分
顧以三為涖今我當覆杯非誓亦非祀

又

言小可喻大意得貴知止誰云止酒功不在詩篇裏十
年分三戒此義同邵子大醉復何樂微醺差可喜譬如
井不波中宵暗濤起又如髮不梳累日復一理萬變紛
沓來樞機中在已節宣誰使之弛張斯善矣君戒雖有
涯皇恩止無涖如聞乾飲詔春宴逢郊祀

兒子兆先送妹之闕里以詩戒之

女生不離膝十載懷三河矧茲東魯行道路十倍過新

春積雨霽潞渚揚清波嘉占得歸妹吉禮方為羅丁寧
送門戒語長意偏多念汝為彼兄綵戲同婆娑趨庭日
漸遠奈此晨昏何汝妹已解事彼兄志登科自非骨肉

親欲去還蹉跎孔門欲觀海所得在一蠡殊塗要同入

仰止心相摩平生我未到遺恨西江羅

往年永玉洗馬
約同遊孔林不

果聖言汝須記堅白在湮磨慎哉路問辭僅僕勞為訶處

身似逃名却饋如操戈衝寒避栗冽歷險防陂陲汝婆
正倚門何以慰汝婆男兒事弧矢有淚休滂沱聊將婉

自序曰
卷五十二
戀恩故作慷慨歌

畫萱為沈編修壽

南國有奇花言栽北堂下
亭亭霜雪姿攬之不盈把
芳心抱孤直高致謝穠冶
冰懷君子交年華去如瀉
地靈得人勝恩露蒙天假
寸草識春暉婉戀難遽舍
修程山水隔妙意丹青寫
晚色駐潘園嘉名託周雅
詩成寄遐祝將以娛壽者
持此侑家庭餘馨抱杯斚

題淵明歸來圖

種菊南山下種桑長江濱逍遙脫物類感激皆天真腰
折豈為屈所重在辱身居然典午世見此義皇民高風
迴絕代圖書流千春茂先昧幾決令伯傷遺述

生菜圖

涼露被西原羣菲共秋色青松帶微黃紫芥間深碧
離瓜復架豆種種成白黑柔藤受牽挽美實爭采摘餘芳
不知名形狀皆可識蜻蜓與蛺蝶婉戀相愛惜大哉造
化功誰為分動植丹青亦何事摹寫出雕刻先生嗜淡

齏而復玩文墨官同詠苜蓿地異棲枳棘聖徒為學圃
物取聊比德君看桃李門盡藉栽培力芹心倘欲獻菜
色寧辭責感此罷揮毫幽吟坐終夕

牧牛圖

偶觀牧牛圖因談牧牛事寒暄每隨時燥濕復擇地渴
愛池水清飢憐春草細耕餘暫教閒負重聊免累肱揮
還應聲指示如解意馴知道路熟狎與童兒戲抱病亟
相醫周官自有制人有愛物仁亦有用物智非無貴賤

殊心力兩相濟君看牧民法於此得深譬視彼不牛如
令人發長喟安得天壤間各使民物遂

癸亥除日落一牙追次韓韻示諸生

衰年重調攝食飲藉牙齒齒疎牙亦落此事但何已物
象榮乃枯氣機行必止終應讓舌柔幸免為唇恥存者
肉還生落者骨先死憶當將落時疾痛任屬已及其既
落後如披石墮水石猶在水中地復非水比飄然如著
處竟與風花似人生亦花類計此真誤矣昌黎落六七

我亦安足紀五十非遠步百步行可指我牙信已衰我齒健何恃身手將無同齒也聊復爾浮危每自累頓脫驚相視歲除甲子窮除舊亦可喜百骸念全歸萬事難具美吾當慎其餘告汝二三子

與黃生館

黃生東南來贄我一束書書中多古意實在黃虞初自負信卓犖達人聊自且得此三嘆息斯言良起予平生江海篇我豈眉山蘇爾祖既逝者而翁亦歸歟巖巖方

石師將與泰嶽如愛之莫汝觀鄙吝何當除

四職圖

靜觀天機間動物各有職或飛可司晨或走可守夕耕
或可代力摘或可懾賊有知本天性况乃蒙養食各存
實或喪息事空受直我田但荒草我屋無全壁遲明誤
鴈朝外戶翻吠客茲當問喘時未罷防邊役憂勞枉夙
夜展轉成嘆息畫師極摹象詩義非諷刺寄言富貴家
此意須諦識

斷機圖

兒出歸亦樂兒學成獨難持刀向機杼割愛傷肺肝三
遷尚可積一斷寧復完由來尺寸功視此經緯端千年
命世才母教永不刊

舉案圖

歡娛無狎恩暗昧不廢禮平生擇對心持以奉君子章
免傷春啼貧賤安足恥關雎本微物託興王化始壯哉
五噫歌高風播人耳

翦髮圖

家貧不貲酒綠髮同金龜客來母已歡酒至兒不知愛
有切磋益匪徒燕嬉為情知不可再感激在一時清風
起貧客好事傳芳辭

先府君墓焚新刻手稿感而有述示兆蕃

平生讀父書句讀粗可了殘編半零落一一費探討嗟
哉手澤存字法有遺稿憶昔當臨時楮墨徹昏曉好古
窮鴻茫蒐竒極幽渺學成不用世祇以慰枯稿殷勤披

簡勞猶及趨庭早摩挲日幾過倏忽年將老有妙善鐫
刻鐵筆隨指爪經時歷冬夏計日通酉卯編成衆所嘆
藝絕經應少蓼莪比周人薦芟慙屈到西郊霜露降卜
日嚴拜掃祝告致文詞精神藉焚燎悲風回輕烟橫淚
灑衰草公家有療曠塵務多紛擾志養久莫酬子嗟德
為孝地下誰有知吾兒慧而夭願榻萬事餘裝藏富綰
縹流傳徧朝野散布盈海嶠書香屬有託夙夜當自保
以茲結構法作室須念考雖無簾金遺世德以為寶

懷竹

三年不種竹得竹如得玉十日不見竹一日腸九曲初
聞平安報舊葉舒更綠忽聽歡笑聲新笋抽五六兒童
亦解事知我性無欲平生愛孤澹不厭食無肉憑將垂
老身醫此未盡俗倉皇欲傾倒愁病相縛束昨夜偶夢
之清風灑心目呼僮汲泉水日夕勤灌沃吾冠晚當掛
吾髮朝已沐為爾一扶筇披襟散炎燠

台州三憶詩

一憶方石老同時遊曲江再憶逸棠翁同舟沂清湘道
義夙相契情懷安可忘三憶定軒公芝蘭與同芳之子
得佳蔭詩書披冠裳一朝復棄去謝病歸柴桑遐躅追
二謝箕裘繼諸黃因之發深慨島嶼遙清蒼

懷麓堂集卷五十二

欽定四庫全書

懷麓堂集卷五十三

明 李東陽 撰

詩後稿三

七言古詩

恭題御書樂方後

文華殿頭風日晴御書和墨雲烟生聖皇洒翰動盈案字字盡
作蛟龍形瑤箋向日光如拭中有古方三四袞卷冊真從大典

傳貽謀遠自文皇出禁廬侍直多名醫班聯拜賜當彤墀囊中
妙得君臣秘紙尾親蒙姓字題承恩捧下黃金闕如揭中天行
日月小試人間癘氣消深藏夜半紅光發古來用藥如用人牛
溲馬溺皆通神古來醫人如醫國病未察形先察脉我皇一念
通炎皇要開壽域歸平康願推萬念及萬物直遣四海同虞唐

赤壁圖為衍聖公題

磯頭赤壁當天倚下有山根插江底江風不動江水深
曾駕扁舟問蘇子憶昔揮毫對酒時俯視塵寰雙腕展

掀髯一笑萬壑空夜叫蛟鼉泣神鬼江山再到已不識
異代興亡知更幾吳強魏走了莫聞萬古乾坤如此水
天遣斯人作勝觀賦成却解驚人耳絕代文章不數公
諸家圖畫空相似誰將意象入寥廓坐覺天涯來尺咫
不信人間有卧遊高堂素壁波濤起東莊先生好古客
謂我作詩如作史三十年前舊品題山高水落依稀是
老去方懷為國憂少時誤作談兵喜卜居未遂頭已白
不向東邦定南紀為公後作赤壁歌莫笑風流非賦比

成國公家槐樹歌

東平王家足喬木中有老槐寒更綠拔地能穿千丈雲
盤空卻蔭三重屋憶昔二王初種時高門駟馬相追隨
五朝恩露簪纓重四世威聲艸木知世間植物因人瑞
培植根深乃天意向日長留宿鳳巢排霜故作蟠蚪勢
舞袖飛花遶北堂屯陰列戟森成行壁窓雨過看秋霽
紗帽風低坐晚涼古來匠石匪廊廟堂中絲竹應同調
馮氏空傳大樹名王公豈待三槐兆木天老朽舊通家

樹猶如此我堪嗟願公人好樹亦好長共河山閱歲華
題陶成艸蟲圖效李長吉

枝頭野花團小紅碧影間日金玲瓏蜂鬚捲花香入空
舞蝶欲去回芳風平原織遍青蒙茸涎蝸篆地鳥跡同
獨螭怒擲如強弓輕葉暗響驚鳴蛩秋蟬翼薄江綃重
殘聲悉入虛無中丹青手奪造化工活潑潑地惺鬆鬆
世間藻繪難為功江南但識孫艸虫五月五日多纖穠
都人競鬪芳菲叢慎勿持向東城東

韓大沖西成歸樂圖為陳侍郎德卿題

老妻驅騾騾過坂阿嬭騎牛牛力緩丁男負荷前後隨
長林蒼蒼日將晚山童慣識來時路山下耕田山上住
耕時愛濕收愛晴剛道今年好風雨秋塲滿穀衣成霜
家雞正肥村酒香窮年勤苦一朝樂愁散兩眉如解縛
官租未了仍私逋眼前且復為歡娛古來農事今亦如
何人畫此西成圖君不見長安脫粟軍亂呼荆湖米至
方市沽此畫此時曾有無

風雲際會圖為木齋閣老題

會稽山頭多白雲
天風吹作細縕春
須臾變化滿崖谷
夏出人間離垢氛
倏來忽往渾難定
後逐前驅若相命
有色皆成五繡文
何心解與千峯競
東巖漸隱西巖出
綠樹青林互蒙密
浦極光浮水市烟
天低影漏茅簷日
風耶雲耶兩不疑
遙空絕島無窮期
亦知莊海扶搖地
不似陶山持贈時
雲飛上天風為翼
俯視齊州九烟碧
去馬來牛不復論
龍從虎嘯方相得
畫家畫此興正濃

此興不與山林同願公大旱作霖雨長似今年作歲豐
王孟端墨竹長卷為孫太常志同題

太常丰采清如玉醉倚閒庭吟翠竹試將水墨為傳神
貌得此君真面目疎枝衆葉紛瀟灑雨散風稀聲簌簌
恍聞環珮下層霄忽訝旌旗出深谷九龍山下去已遠
彭城一派誰當續笑看江南沒骨花嬌紅艷紫皆塵俗
蔣家三徑今無主零落湘湖纔一幅我王愛竹復愛詩
擬畫簷簷賦淇澳夢魂彷彿無處所不是長沙定安陸

詩成揮手謝青卿莫道燕歌非郢曲

題徐主事廷用所藏畫鶴時徐歸省長沙

江沙翠竹搖森爽老鶴當空墮清響萬里金天閭闔風
長夜一聲神獨往濯盡紅塵舊羽衣方知碧落無矰網
飛當雪落更身輕舞向月明應技癢岡頭彩鳳須同調
世上凡禽空夢想拔地錐看一日成沖霄翮是千年養
玉珮疑隨子晉笙錦袍合稱王恭氅何人粉墨得此本
直為山林助高賞詩成剛附鶴南飛歸報青田紫芝長

石城雪樵圖為李侍郎世賢賦

姑蘇城北虞山側石城峻嶒雪千尺憑高歷險去復還
獨有前村老樵客疎林落葉聞虛響遠徑荒苔斷行跡
仄磴危梯幾處通短衣長帽何人識東華一去三十載
身上塵縑無寸白夢想猶疑伐木聲樓臺不礙看山色
石田沈翁好事者點染吳縑成粉墨老氣橫隨筆底生
神交豈恨天涯隔會稽太守多豪興灞水幽人抱詩癖
有約重烹學士茶為君細掃松間石

與張都憲公實話別長句

烏臺豸史巡江淮漕舟百萬東南來吳粳如山積燕市
九陌白日紅塵開手題笏記報天子當軒一顧重瞳迴
天教今歲足豐稔人道此公經濟才文皇廟算恭襄績
坐遣官軍飽供億年深役重苦不支百孔千瘡誰為塞
古稱錯節須利器公縱欲辭寧可得蒼顏驚見老風霜
手妙忽傳轟霹靂羣猜衆開了不知但惜兵資與民力
城狐潜踪社鼠走胝足頽肩方一息公來意氣凌雲霄

公去還聞山嶽搖長烟盪空日照地冠蓋滿路隨干旄
與公臨別話疇昔三十七年魂夢勞公今勲業不自負
我獨竊祿慚清朝願期晚節共金石莫使青銅空二毛

畫馬二首

健馬奔泉如渴虹活馬洛水如遊龍竦身作勢跳原地
仰首噴沫生長風倦思滾塵痒磨樹似是馬身逼馬語
莫將意態問丹青天機正在忘言處

前馬奔騰後馬逐沙苑東來西江曲相遭意氣兩不平

踏盡長堤春艸綠奚官一騎高如山金環玉勒聲珊珊
會呼羣駿出雲霧同立春風十二欄

題劉式所藏山水圖時廷式募兵寧夏還復任

巡撫

賀蘭西來山作屏黃河東迴水為城層峯入空鳥雀避
濁浪捲池魚龍驚平疇沃野不知數圃亦可種田可耕
大開閭閻集將士中有十萬屯邊兵中丞昔奉西秦使
指點山河識形勢風日千年古戰場冠裳一代今王制

遠道關心夜聽笳高原駐目春停轡時聞狐豕相出沒
別選貔貅為扞衛祗應身自作長城水色山光為增氣
繡衣驄馬重遊地蓬矢桑弧少年志他日歸朝檢畫圖
為子細說防邊事

憶昔行贈黎叅議本端

昔年我在文僖門門前多士如雲屯文僖先生子視我
我視諸郎猶弟昆登華涉峻豈自致九原再拜先生恩
郎君年少各已壯置身共在青霄上過眼星霜四十周

大郎出守還歸葬二郎忽作雁孤飛別我欲去情依依
滇南道路風塵遠楚國經過耆舊稀存亡異轍方同調
一家父子皆金緋關西清白本世德黎本楊姓冰蘖孰謂儒
生非題詩贈君聲激烈九月京城滿城雪白玉堂中白
雪歌黃金臺上黃花節衡山峯高湘水冽此時此景真
奇絕超都歷塊從今始萬里長途非暫蹶努力功名穹
壤間丈夫自古輕離別

王孟端竹長卷

九龍山翁興豪放手執蜿蜒青竹杖酒酣怒擲江中流
化作一龍長數丈一龍躍起一龍隨倏忽羣龍駭奔浪
穿沙觸石連雲霧頭角森森各相向其間小者稱釋龍
鱗甲蛻盡風神同人道此翁善劇戲造化乃在指掌中
君不見九龍山翁云何許九龍山上多風雨素壁空堂
枝影寒夜半無人作龍語

題胡馬圖贈楊都憲應寧

國初以來重戎馬分曹置官牧于野平原極目沙艸青

中有長槽連大廈二十四監叅差開數百萬匹聯翩來
風髻霧鬢起平地一一盡是凌雲才諸番況復開茶市
玉篆金碑作符契官茶價重番馬肥不遺公家有遺利
公家利去歸私門地力盡棄天無恩圍人不死死道路
縱有馬至空名存去年鐵騎聞聲入我士雖強馬不給
破敵摧鋒不要論飛塵絕漠何嗟及聖皇西顧垂宵衣
都憲承恩入帝畿由來考取在經濟亦有官兵勞指揮
極知君命如山重復道公才似泉湧三千駭北數非多

百萬貔貅氣增勇西番風紀稱師模南郡禮樂歸文儒
眼前時事有至急馬政雖一非其祖世間萬事無終極
撫卷為我三嘆息他日功成獻馬圖因公更問平胡策

畫鷹

卑枝詰屈高枝舉小鷹低回大鷹怒殺氣森森動碧寥
千山落葉紛無數雲霄意槩風霜姿傲睨六合無雄雌
夢迷東海未歸路興在秋原初下時吁嗟乎巢清羽兮
元有肉莫遣鵷鷺空側目

王德輝侍郎母壽八十詩時德輝奉使歸省

鑑湖綠水光如黛堂上長睂動光彩侍郎身着錦衣還
滿眼物華春不改珠冠翠羽高玲瓏輕身緩杖何從容
北魚南笋味相似越舞燕歌調不同玉堂珍饌黃封酒
問娉還憶長安否客至猶懷斷髮心老來閒却和熊手
君家瑯琊忠孝門母今有子復有孫願婆高壽兒亦壽
重慶堂前春復春

鍾欽禮雲山圖為史都憲天瑞題

江南畫史誰端門會稽老鍾清且溫圖成長練置急雨
彩筆滅盡風神存陽崖陰谷半明翳上有烟雲時吐吞
深林蒼鬱石硯磊野火不斷天無痕當時得意每自許
傲睨耻受王公尊勾餘拙翁喜墨竹二者異法雖同論
謂渠畫格自有派房山之子南宮孫手持此圖自東海
海色尚帶扶桑暎千巖秋聲萬壑樹咫尺不辨東西村
幽亭野集昔誰子似有賓主無琴樽問之不答若莞爾
物外別自成乾坤我生愛山復愛竹對此病目開餘昏

君看巖谷最深處好著數箇蒼筤根

長安舊第行壽劉檢討瑞母七十其父用行終
東山僉事予同年進士也

長安舊屋郎官宅四十年前老賓客同年兄嫂稱通家
轉頭歡笑成咨嗟東遊齊山西入蜀遙在舊鄉思舊屋
承家有子安用多還讀父書登父科千金買屋幾易主
為指當時斷機處大倉稻熟官酒香猶是平生冰蘖腸
屋長安居酒長醉願婆百年復千歲

客有談仲僉事與立賑濟鄉民事聞而義之且嘉其能與立將赴河南韻以為贈客乃費子克贊善也

淮陽城中人食人部使北來勞憲臣廣西監司私賑貧問渠元是揚州民身倡義士傾倉囷民吾同胞矧吾親監司拯難不愛身手幹疫氣回陽春前行後隨若次鱗但有給與無譏詢彼氓千愁復萬辛喜極不覺號蒼旻患非在寡而在均聖言在耳識已真西江大史來細陳

我忽聽之雙睂顰今年監司朝紫宸問之不答但逡巡
明朝別我黃河濱我欲往送河無津南軒井法濟鄉鄰
意以一髮懸千鈞願子演此為經綸監司發軔當茲辰
為渠重賦車鞿鞿

林良聚禽圖為馮御史執之題

枝間啁雀聲啁哳江頭浮鴨嘴啞啞誰教乾鶴報新晴
似道山前泥滑滑日暮欲往行人愁亦有山禽雙白頭
年芳物性若反覆惟有無情江水流君不見嶺南林郎

舊時筆落墨殘縑渺蕭瑟酒蘭風雨罷披圖臺上烏啼
月東出

題趙子昂射鹿圖

高秋出獵長城下碧眼胡兒騎剡馬弓如月滿箭星流
已似千山毛血灑馬前逸兔或可脫山下老麋身欲赭
彼貪但為口腹謀不見巴西放麕者吳興王孫燕薊客
酒酣興發時潑墨極知紉綺足風流忘却河山限南北
噫吁噉薛郎未掛天山弓披圖仰面來天風

劉學生家藏贈行詩畫

公諱世衡
廣陽人

刻藤四尺花如雪詎向都亭贈離別黃扉閣老坐題詩
薇省仙翁去持節冰顏玉骨兩無瑕平生交誼如此花
絕勝東閣郎官興不似西胡處士家仙翁老去花猶在
奕葉書香長不改時看雨露發根荄肯受塵埃蔽光采
故物爭傳畫有靈相逢莫道花無情剛羨廣平能作賦
久知光祿喜調羹調羹作賦皆能事解識當年贈時意
藻繪休憐五色文瓊瑤不傳千金字玉堂學士仙翁孫

百年文獻今猶存要將事業前賢比留與雲仍後代論
張主事潛奉使闕里紀之以詩兼東衍聖公

漢家天子臨雍日孔氏雲孫應世出關西後士東曹郎
奉使南來馬行疾長安雪後開新霽炫冕山川豁蒙密
經心道路遠逶迤翹首殿庭高萃律百年盛典聞褒卹
萬古遺經重刪述極知禮樂超唐宋冕十二旒庭八佾
平生仰止在宮牆真見升堂還入室杏壇絃誦忽三千
童冠舞雩思六七顏祠孟廟皆吾黨近者數弓遙者駟

會陪主組導衿裾歸向虛庭拜天秩

題衍聖公所藏畫竹因憶闕里南國之勝故篇
終及之

高堂四壁歌舞起夏玉鳴金奏清徵摩挲素練往復還
似有秋風生爪指古來寫竹如寫神倉卒應接皆天真
想當磅礴向空廓已覺意氣超風塵我家舊傍瀟湘住
滿地清陰不歸去每聞圖畫即江湖長怪西窓隔烟霧
闕里牆東縣令家名園種竹不種花蹊回徑折入蒙翳

下有泉水無泥沙長流瀼瀼穿林響短髮蕭蕭助森爽
舊路無因縮地看新梢定見參天長孔客南遊興未償
此時此景故難忘擬刻琅玕三百字為渠題寄墨君堂

夏太常墨竹卷為屠都憲元勲題

太常作畫如作書銀鈎鐵畫交扶踈試將醉筆寫秋色
便覺紙面開江湖濃陰匝地雲烟濕黑雨灑空翻墨汁
硯池深夜籜龍飛鱗角向人皆起立玉堂學士觀揮毫
復道人間有鳳毛中書君頭老不禿元是中書畫中竹

君不見九龍山人王子猷百年書畫餘風流唐臨宋帖
世已少此畫此書今幾秋

用山艸亭為王侍郎民望題時王致仕歸

華容之南洞庭北明山峒堯倚天碧峯迴路轉高復深
下有東曹侍郎宅侍郎昔在山中居三間艸屋一牀書
門前花樹歲開落簾際烟雲時卷舒扶筇上山石巖薜
泛舟入湖水空濶醒看庭月挂松梢醉愛江風起蘋末
朝走燕齊暮入秦竭來關塞隨風塵丹心用盡髮半白

三十八年秋復春亭從別後誰為主山若有情應解語
別君年久望君歸俯仰乾坤同逆旅南山之樂北山勞
問君定是何山高有人新向東山去且共相過醉濁膠

題朱元暉雲山圖卷送木齋先生致政同歸

謝君家住東山東山頭雲氣長青蔥山人善畫者老鍾
禮名欽橫圖三尺懸堂中予為作歌有古風雲山變幻態

不同吾家有圖圖更工工部筆法如南宮烟毫雨墨淡
復濃山有萬疊雲千重宛若綠水浮芙蓉林深樹密行

無踪有眼不辨柏與松幽泉隱耳鳴琤琮咫尺似覺香
爐峯由來畫與書法通外極秀發中藏鋒米般夜半光
如虹予心愛之手所封幾年什襲隨巾籠公歸別我行
匆匆持贈不比華陽翁為公撫卷歌雲龍四方下上將
烏從停雲靄靄雨濛濛遙當海徼瞻方蓬仙丹一去如
凌空稽山鏡水多兒童復道東山有謝公身為雨露裨
天功出岫入岫何從容蒼生之望安可窮吁嗟乎蒼生
之望安可窮

茅山艸亭為餘姚謝生正作

亭在汝仇湖之上
餘姚縣約有五十

里餘

澄湖四面平如鏡湖上一山如鏡柄小亭孤絕冠山顛
影落虛明波不定朝看海色開羣暝夕愛嵐光閃餘映
包含萬象入空寥上有鳶飛下魚泳樵徑崎嶇或可通
漁歌歎乃遙相應中有儒生讀古書誅茆伐木披荒磴
山擬句曲豈三仙亭比杜陵爭一勝誰遣湖來作汝仇
莫言墩去非公姓山中無事聊習靜席上有珍方待聘

溪雲澗月供揮灑春鳥秋花入吟咏烟霄意氣江湖興
鐘鼎山林豈天性從此功名奕代傳茅山合與東山稱

贈王提學雲鳳

我思古初制文字篆籀之餘散分寄漢魏隋唐作者多
後來俗學空姿媚昔從小篆得古法降作隸書差自拔
周蘊楚芟心自甘持以語人如嚼蠟太常喬卿筆清健
後習隸兮先學篆使節新從晉地回名山古廟書題遍
柏臺外史蘭亭孫骨力苦硬如松根搜奇索隱極茫昧

斷石遺墨何繽紛旁枝並集不遺力點畫無釋隸與分
分徑不刻中郎石比篆聊同許氏文聲離韻協皆成帙
字或孤存或重出自作意匠指良工宛轉銀鈎鐵為筆
渠年有十今但一從此蒐羅願終畢平生好古心獨勞
更謝羣疑遠相質栢臺西去書滿車我欲留之三嘆嗟
書成珍重許寄我先為摩挲老眼花

錢塘江潮圖為喬少卿希大作

錢塘江頭江倒流中有潮聲號萬牛堆銀如山雪如屋

遠見滅沒當空浮千峯將顏樹欲禿海若股栗天吳愁
來船歡忻勢自下瞬息千里無滯流去船乘危貴得正
力盡一過且復休躋攀分寸偶失手頃刻下飽黿與鱔
由來咫尺不自覺遠望不敢凝雙眸客來未到膽已落
借問同還見得不何人起笑欲起舞越東老翁搔白頭
羣兒招呼或助叫倏忽過耳風颭颭達士遐觀得奇賞
七澤五湖同一漚天道虛疑月盈缺世情妄假人恩仇
復將險巧作戲劇鄉里少年誇善泅潮來潮去亦何意

人間萬事良悠悠我時渡江不相值空對燕客談杭州
壯懷高興兩莫愁三十五年秋復秋誰將妙思入畫本
似與造化爭雕鏤酒酣月落不知處夢醒尚作江南遊

題楊妃出遊圖

沉香亭前春日裏海棠睡足風吹起玉驄馱醉出華清
頭上綠雲嬌不理內人宣索已多時金鑾供奉來何遲
有誰並轡復顧笑不是秦姨定虢姨階頭奚官執控走
問渠合似安郎否不然那得近前行祇計籠禽隨喫狗

君不見馬嵬坡下蛾眉愁可憐白骨埋荒丘柳絲難綰
芳魂住應從君王萬里遊

題胡山春曉圖

湖船着水平無垠蓬上使篙蓬下坐山光四面錦屏開
橋影中天綵虹卧輕鴉繞樹拂千點老鶴叫空時一箇
宴客遙將綺席隨遊人不惜青鞋破江南風物今餘幾
看畫題詩兩無那却恐湖山畫不真他年自買扁舟過

鷺鷥圖

平湖影動波光滿白鷺絲長羽毛短舞風梳雨未騰寒
落却蓮衣秋不管引步昂頭高復低凌虛欲舉意還遲
穿花隔水時隱見花底遊魚知未知崔家池上多秋信
碧艸長天迷遠近何似王維畫裏看水田漠漠青無盡

鷓鴣圖

鷓鴣啼處春江綠日暮淒風吹苦竹相呼相喚不停聲
萬恨千愁啼未足有時格磔還鉤輶此聲欲斷無時休
風低不渡三江水竹冷先驚八月秋我家舊在湘南住

猶記曾聞鷓鴣處不似雲安有杜鵑聲聲道不如歸去

懷郴竹為何郎中孟春作

郴州形勝天下稀千巖萬壑勞攀躋山高地峻水清駛

此語吾信韓昌黎何郎少年美文藻直似賞識隨標題

偶逢燕人作楚語某水某山皆不迷黃岑名山深入雲

霧楚越藩籬此門戶五嶺中分隔雨晴諸峯忽變成朝

暮蘇仙

山名

恍惚無定所何公山名流傳豈其祖有泉如燕

泉復如潮

泉名

與月盈虛社來去編磬石磬懸鐘石鐘似有聲

奇形怪狀紛無數吾祖昔間先此州吾家近住茶溪頭
扁舟三日不一到空負平生作壯遊

紫林書屋

一林霜樹明如綺落日餘霞半山紫下有茅齋八九椽
書聲忽送秋風起天宇澄清鴻雁高窓前墜葉時飄蕭
秀看丹桂天邊發志比青松雪後凋十年擢第登朝省
幾向山林憶鄉井匣裏雙龍試一鳴空中獨鶴聞聲警
君不見衡鶴峯頭雲正開洞庭舟上客初回歸時好種

琅玕寶管領丹山彩鳳來

七駿圖

誰哉畫此七駿圖風格雖同毛骨殊回頭卧者若有呼
行者迤邐求其徒聳身並立兩不語意氣雲霄似相許
閒思嗅塵痒磨足進步欲前仍躑躅君看最後一馬驄
雙瞳耀日尾梳風長驅如山屹不動舉首一顧千羣空
平原無人青草長隨意西郊自來往一飽能忘雨露恩
十年未斷風塵想天閒十二雲錦多空驚歲月易蹉跎

試教一日馳千里月窟崑崙奈爾何

漁舟圖

空江颭颭鳴高樹落葉隨風渡江去晴波淼淼接天遙
目斷飛鴻無盡處江村漁翁家在船懸罾結網自年年
船頭老婦引篙立篷底嬌兒抱櫓眠舉見魚魚尾活
滿眼浪花時潑潑烟雲影滅向中流款乃聲來起天末
農夫把耒商踏車人生無處非生涯每從勞逸殊好惡
江南無如釣漁樂君不見洞庭湖邊青艸多慈恩寺前

生白波濯纓濯足兩不遂誰和滄浪孺子歌

聚禽圖

西塘日落秋波綠兩兩鴛鴦水中浴野鳬似雁忽西東
落翠棲紅亂人目鳴鳩愛雨鵲愛晴宿者自宿行者行
惟有白鷗忘世事朝來暮去兩無情

子昂畫馬卷

翰林學士真天人平生書畫皆通神自言少小嗜毫素
寸紙遍作雲烟痕老來意態盡物理畫馬欲過曹將軍

此圖似出西城種骨法傳奇氣軒聳將身跳地跼不前
矯首見人驚欲踊燕家死馬猶堪賣況此風神解飛動
在野湏教一顧空登臺未覺千金重崔郎愛畫復好奇
向來得此信且疑為樂指點是真跡老我聰明非昔時
圖窮忽見銀鈎筆忽訝驪珠海中出江南偽本今已多
入眼自湏公甲乙世人得者惟見一至寶逢時故難匹
從此高堂展玩頻明窓淨几無長日

題夏珪山水圖

江天雪暗江雲黑不辨溪南與溪北江風洶洶山木號
怪石飛泉怒相射柴門不關艸堂靜去馬來車兩無跡
波濤瀕洞川氣昏亦有扁舟遠行客中流無帆撓不進
船底差差浪花白歌蓬反舵苦不持雨笠風蓑半無力
衝寒冒雪者何人咫尺相看不相識疑是山陰訪戴翁
山裝水載何匆劇似聞軟語相慰藉豈有幽歡共愁寂
問渠此去去何之却恐欲歸歸未得畫師本抱山林癖
手製生綃開水墨橫揮直掃百態生不獨溪聲與山色

君看歲暮江湖裏如漱寒流枕高石對客披圖酒半醒
空堂五月無炎赫

太原宋生灝手刻先君字法手稿贈之以詩時
生已授廣平通判矣正德三年十二月三日

太原宋生得心畫點染毫端付金石寶賢堂

晉府

上古名

書一一親曾手翻刻秋闈累舉不一薦三入長安人未
識喬卿篆刻初入室數紙西來搨新墨嗟予相字如相
馬肯向驪黃辨顏色吾家府君妙楷法晉帖唐書飽探

索殘篇斷楮空塵埃生也見之三嘆息摹朱勒石不辭
勞細入秋毫大盈尺炎天汗浹衣沾濕晚歲冰霜肉綳
折當其腕指所至時意匠心師兩無跡長安俗工不解
意僅有形模少風格逢生不早亦非遲猶及儒生頭半
白須知絕代有名家兼為私門存手澤五百楊梅豈待
年三千薦法空論直生今作倅當畿府方以文章為吏
飾他日編成却寄渠書中定有長相憶

寄壽封君楊留耕先生

峨眉山頭雲氣濃錦宮城上花枝紅地靈人傑應時出
往歲吾識留耕翁一從獻策明光殿三世科名眼中見
鸚鵡洲前驄馬蹄鳳凰池裏騏驎現一品封高七袞稀
烏紗玉帶明緋衣祇疑天上神仙是若比人間富貴非
誰信今人不如古片玉一枝安足數蘇氏奇峯僅有二
實家芳樹纔稱五太史文章秘閣勲少年狀元才出羣
眼看是父復是子此語吾傳揚子雲白頭憂國心尤切
剛道成平好時節已見西川洗甲兵更依北斗瞻京闕

玄霜彩筆泥金箋為君興寄西南天願山不童花不老
一歲一賦長生篇

題雙鳳圖為崔甥

梧桐枝上矐矐日共指丹山鳳凰出文采天教五色呈
或赤如朱黑如漆族無大小皆稱長聲有雌雄同應律
阿閣巢深始養成虞廷獻瑞期難失池上奇毛信有雛
世間凡鳥空成匹極知耳目非常見聊假丹青為幻質
點染真疑造化功品題合稱詩人筆聖朝有道萬物遂

郊有四靈何但一已看國士多羽翼復道郎君好家室
為渠拂拭還愛惜飲以玉泉食竹實會須把酒對新圖
坐我高堂聽鳴瑟

東坡煎茶圖

次坡韻

君不見玉川兩腋清風生又不見黃家竹几車聲鳴東
坡別有煎茶法一勺解使千金輕江南雷鳴二月二已
識山人采芳意東京貢院試一煎汁中那有中泠泉翰
林老仙出西蜀醉掃蠻烟寫珠玉詩成吻渴腸亦飢長

鬚拂紙揚修眉知公此興不獨樂蘇門六子長相隨請
看畫策題詩手猶似當爐運筆時

墨梅一首

江邊老樹根如鐵枝上繁花亂成雪千葩萬蕊一時開
剛值江南好風月川迴谷轉山路微春來無處無芳菲
行遲似愛影在地坐久不知香滿衣江南此景看不足
江北見之如見玉丹青紙上漫成塵桃李擔頭空過目
平生知己孟與林招之不來勞我心看花載酒不知處

灞雪蕭蕭湖水深

題杜古狂畫壽張封君為禮部員外繼孟作

杜狂作畫如寫神
朱顏皓髮真仙人
持杯向空坐白石
傲睨城市無風塵
飛來素鶴如青鳥
似報丹書下蓬島
為言仙籍已通名
却望雲端拜天表
烏紗束帶宮錦裳
始知身是尚書郎
高門多客車馬集
春宴隔城鐘漏長
一從西陌移家住
猶記城東買書處
春官桃李足新陰
暮景桑榆有佳趣
仙耶官耶兩不知
且看此畫復此詩

郎君再拜起謝客歲歲來共長生卮

題蟠桃圖壽邵淑人為國賢侍郎作

春光如畫還如織枝上仙桃紅欲滴醉日薰風始釀成
倚雲如露真消得度索山頭錦作堆玄都觀裏多蒼苔
東方小兒強解事誰遣上樹偷三回司徒清鑒時爭羨
天上人間兩曾見內殿初聞侍宴歸北堂再覩東風面
種樹何如種德難物華人傑總稱賢願栽千本壽千歲
不作尋常幻畫看

山水圖為魯司業題

九風肅肅溪水急溪上高亭暮來集空中落葉灑衣裳
蒼苔滿地無人拾深山野客忽相過向來塵事何其多
短言長語未終日回首白蘋生碧波

予莊詩

荆溪之莊誰所廬荆溪主人稱是予荆溪野人不識渠
有眼道是延陵吳自言家世荆溪住宅相本出南州徐
買田自釀北海酒引水欲活西江魚古來陵谷如翻手

俯仰應懷昔人有澗州巖花不計春過雲飛鳥猶回首
自別茲莊二十秋四時風景一時收共看錦服明清畫
莫遣青山笑黑頭莊哉莊哉不我負自我得之非外求
君不見張公古洞空傳信蘇公獨山誰所命祇今那有
張蘇家空餘往事令人嗟天壤之間孰非我莊以予名
無不可萬間廣廈幾時成留取高名向江左

懷麓堂集卷五十三

欽定四庫全書

懷麓堂集卷五十四

明 李東陽 撰

詩後稿四

五言律詩

種竹

種竹復種竹屋西還屋東都城十日雨長安一林風宿
土得餘潤團陰分小叢高秋想鳴珮側耳向晴空

小園即事

過雨東園暮畦蔬架已瓜分恩到僮僕沾潤與鄰家學圃非吾事憂時且歲華有懷成獨坐欹側岸烏紗

假山成戲作二首

疊石危峯起盤根古樹成竇留雲宿處溪待水流聲意匠疑天巧林居見物情退朝先拄笏爽氣忽然生

有意尋丹壑無錢買白雲岡巒繞數疊城市已平分遠可遊松子清宜隱竹君山成謝岩叟題壁為書勲

次韻送衍聖公孔聞韶

孔衣清尚綢衛竹美如圭經學親傳魯韶音想在齊海
觀知水術嶽望有山梯遠道須珍重扶持仗老奚

崑山毛翁百歲詩

種菊南山下秋風百度花乾坤此間氣江漢復誰家管
榻經重蔽陶冠已十加海籌仍不一桑陸看量沙

竹坡

種竹前坡滿其如秋興何迥含山氣爽低礙夕陽多有

地留冰雪無心鬪綺羅錦衣歸稚子洗耳聽鳴珂

次韻答方石先生二首

五載詞垣病三回命使臨乾坤無報德江漢有歸心岐
路分南北功名慨古今微涓能幾許恩海向來深

其二

溫詔勞三諭威顏仰四臨老妨扶病力拙苦濟時心世
遠方思古吾哀恐自今故人高義在藥石敢辭深

山行十首

丁亥十三日

遠寺無烟火晴空見羽毛
水光浮日動秋氣出林高
城市身仍係江湖興本豪
馳驅亦王事元不是賢勞

又

十月交仍淺千林落未空
雨苔留徑碧霜李綴枝紅
有李名十月紅使客瞻天近
田家說歲豐大康思外職
吾欲咏幽風

又

寶刹開湖面清泉漱石根
僧田不入稅甲第漸成村
壁有題名在亭因駐蹕存
勝遊非我事休暇亦君恩

又

獨宿荒山裏悠然自寢興犬聲山樹葉人影佛堂燈室

靜聞教掃峯高倦憶登詩成思二妙遙在碧雲層

衍聖公兄弟宿香山

又

路闢天門險根蟠地軸深入山雲霧合出寺鼓鐘沉意
遠窮千劫民勞豈萬金平生不到處感慨一登臨

又

風露闌山

山名

冷幽宮夜不扃地應藏劍烏天為洩精靈

遠樹聞清籟遙山列畫屏人生一俯仰塵夢幾時醒

時有事於甘懿王園

又

翠微山

名山

深不斷迤邐到香山

名山

大谷呼頻應尋源去却

還夕峯明滅外暗霧有無間預與山林約禪房定不關

又

鑿翠開虛牖分清出小池高風去月近深樹得霜遲院

靜時聞梵燈明夜看棋登臨原有意邂逅本無期

又

平明登絕頂萬象極秋毫入谷境逾窈緣崖山轉高
法門空色界塵海任風濤不識經營費猶嫌跋涉勞

又

路入金山口峯巒兩派分亭臺中使宅松栢主家墳
社古村村靜僧鐘寺寺聞我今猶祿食俯仰更何云

憲宗皇帝輓歌詞十首

廣殿臨丹闕重闈麗紫霄康寧過六紀熙皞見三朝
月窟瞻猶近飈車望已遙萬方同洒涕痛極轉成謠

其二

海宇瞻依共宮闈奉養尊舊恩長樂殿遺戒濯龍門宋
室新儀陋周原古制存欲知流澤遠聖子復神孫

其三

月有重光象川無再逝波人間璵璠遠天上玉樓多幻
界三千隔韶光九十過感恩兼戀德空有淚如河

其四

鳳掖承歡地龍樓問寢辰感恩方愛日厭世已離塵地

隔黃泉夜山空碧殿春裕陵松柏在瞻望總傷神

其五

慶積傳宗遠年高閱世深憂民終夜念保國一生心顯
耀成三象遺言重萬金鬱葱佳氣裏陵樹晚沉沉

其六

舊業山河壯餘恩雨露饒羣臣思社飯命婦憶晨朝暗
月留鸞鏡悲風引鳳簫丹旌看不見雲路轉迢迢

其七

壽已稀年過身將五福兼
休光彌宇宙遺澤到洪纖
山折鐘初應籌空海漫添
試看幽僻地清淚灑窮簷

其八

北郭車塵遠西陵樹色重
池棲華表鶴雲逐鼎湖龍
命使三時奠空山半夜鐘
他時奔駁地冠佩相追從

其九

紫殿春方寂玄宮夜正長
幽泉沾竹淚哀壑奏松簧
玉几心悽愴瑤池事渺茫
乾坤終古在俯仰恨難忘

其十

桂兔秋逾好
軒龍晚更輝
兩朝天下養
千古世間稀
眼見新宮起
神從別殿歸
不須論往事
一涕一沾衣

太皇太后發引鼓吹詞

應天長

天風吹斷瑤池夢
落月高城笳鼓動
綵雲迎青鳥
送哀絳一聲天下慟
上林霜露重
空使泣鸞啼
鳳試看水朝星拱
此情誰不痛

孝宗皇帝輓歌詞十首

其一

此日真何日陰雲掩上台晦明天色變嗚咽水聲哀
舊恨齊山嶽遺恩遍草萊萬方同一慟痛哭隱成雷

其二

聖德同天縱皇圖與日升乾維中斷絕坤軸乍欹崩
輦蓋辭雙闕山河護六陵生成真罔極攀送竟何能

其三

恭已同虞帝祇台比夏王內廷無女謁外園絕禽荒富有天和養終期歷數長彼蒼何弗弔民物共悲傷

其四

聖道通三極王言似六經面開天日表書作虎龍形杞國天方墜華胥夢不醒萬年金匱在遺訓炳丹青

其五

鶴髮承顏日龍樓問寢辰兩宮同奉養九廟極精禋孝可通金石誠能動鬼神徽稱高萬代垂憲及千春

其六

畎畝蒼生念閭閻白屋情覽章時數日露禱必深更歲
旱憂疑獄天寒憫戍兵尚遺寬恤詔朝野共吞聲

其七

極意窮幽隱虛懷仰治平近臣常造膝閣老不呼名道
合君臣義恩深父子情化機元不偶天意竟何成

其八

玉几終宵坐彤闈徹曉通孫謀思祖訓家教託儲宮天

語叮寧際龍顏髣髴中此身真隔世地下倘相從

其九

海宇熙平日乾坤夢幻間虹流始革渚龍臥已橋山堯
冀驚新換湘筠憶舊班翠華天上去無路可追攀

其十

靈駕歸何處茂陵西更西日輪埋地軸雲路隔天梯月
迴鳴鑾靜闌空班仗齊玄宮松栢裏瞻望轉悽迷

孝宗皇帝發引鼓吹詞

應天長

太平天子龍飛運二十年來如一瞬大舉行笳鼓振萬
里山河終古恨王陵佳氣近為報宮車來信縱到海枯
山隕此哀何日盡

雪後

十里城陰路肩輿緩步行好天晴更碧積雪夜偏明病
覺官情減老於人事輕交親不可棄聊與盡生平

西莊獨詠得四首

六月二日

城市多炎鬱園林剩得秋雨晴山骨見庭曉露痕收野
汲嘗新井溪行涉淺流獨吟還自酌幽賞為誰酬

又

夏日長如水良辰古亦難酒醒思枕石沐罷想彈冠露
草侵衣濕風泉永齒寒詩成無刻處方擬種琅玕

又

長日似兩日可人無一人濁膠濁亦醉村語村還真開
落花相代青黃麥未勻那知老將至六十又生辰

又

望遠宜新霽歸遲待晚涼
嶺雲隨鳥盡溪樹繞堤長
獨立憑誰語幽懷祇自傷
乾坤無盡日俯仰意難忘

題屠司冠元勲小像

仕路逢青眼朝簪上黑頭
唐科龍虎出周數鳳麟遊
待漏彤樓晚分司粉署秋
科名隨禁籍從此達宸旒

其二

一自登科後青袍已換緋
百官同虎拜三見六龍飛
笏

記分明語天顏咫尺威班行與道路顧盼有光輝

其三

躡步登高省埋頭入簿書午風鈴索靜斜日吏行踈漢
法持三尺于門擁駟車公餘多逸興詩筆幾曾虛

其四

舊影清風在深衣古制存水流花引路客至鶴迎門丈
采弓裘盛鄉邦爵齒尊東門還洛社盛事兩堪論

題米南宮真蹟卷贈邃菴太宰先生

地坼山根斷，天空海氣開。乾坤此勝概，冠佩幾重來。揮
灑如篇翰，風流寄酒杯。為渠連夜夢，飛達妙高臺。

其二

懷古心猶壯，探奇卷屢開。眉顰嗟我老，匱韞待公來。寄
遠難憑鴈，論文重舉杯。他時臨賞地，歸坐月中臺。

偶得南宮多景樓詩一首，筆墨清潤，蓋得意書也。因憶邃菴博古好學，而此詩此景又其所卜居地，舉以贈之，復追前韻二首書于卷後，予遊

江南常登此樓目擊其勝及遽菴既定居而陽
羨之田已棄坐月亭中無我足跡他日展玩間
未必不懽然太息也正德辛未六月望日孔氏
女卒已閱歲錢郎中榮自錫山以詩來慰憶自
亡兒之喪弔輓者屢次十至而今僅得此悵然
感之因次其韻二首以自慰

浮生如有寄老淚忽無時豈謂東門恨翻為永叔悲

祭歐

女文云於家有一日之
愛兮于汝有終身之悲望深猶駐目話久或停卮為謝

同心客詩來慰所思

軒蓋寧親日
輶旌送女時
未歸先恨別
既樂轉成悲
遠道無時緋
荒林有酹卮
幽魂如不死
應起望雲思

病起理髮次李羣玉韻二首

一病身仍瘦
三旬髮始梳
雪疑襟袖滿
風怯紙窗虛
亂枕拋書後
衰顛入鏡初
倦餘方起坐
剛愛客來踈

又

病髮猶堪理
憂心不可梳
民勞看已甚
兵捷報常虛
潦

水成冰地田家望雨初我生嗟可尚醫國計還踈

聞雨

快雨劃殘夢起聞簷漏聲炎蒸五月盡愁病一時輕地
喜收麴麥天教洗甲兵老農幸未死饑眼望秋成

種竹二首

種竹動經歲竹來人未知分從根定後移趁雨涼時爰
葉看書卷憐蓀望早遲歲寒方善保風雪漫相疑

又

種竹幽堂下涼生暑氣微
愛長過我屋看綠上人衣坐
久月初出夢回風漸稀
一竿如可釣吾欲問漁磯

中秋獨坐有懷邃菴太宰

坐久夜方寂望深秋更高
霧奩開月鏡塵海靜風濤
憂國頭空白懷人意轉勞
汲生猶卧病何力謝官曹

九日遇雪聞邃菴見過以詩趣之

節近逢花早秋深見雪稀
風情兩奇絕衰病少光輝
抱寂仍欹枕登高未拂衣
有懷方不寐剡棹莫空歸

又

雪幔朝慵卷風軒午午開
冒寒花競發望遠客能來
病有東籬興詞荒下里才
呼童頻掃徑不敢惜蒼苔

五言排律

桂巖書院為戴給事銳題

傑構成新築嘉名滿舊文
靈巖通地脉仙桂發天芬
國運興炎祚邦鄉解魯紛
川原開莽蒼弦誦接朝曛
扁象濂溪揭山疑岳麓分
家門大小戴經籍古今文
谷冷思

吹黍池香憶采芹義方規再拜仁里德頻薰五世宗相
續三遷意獨勤學田多稔歲廟祀藹餘焄氣象曾瞻孟
師資本重汾冠裳皆秩秩禮樂漫云云野服朝宜浴庭
膏夜屢焚長流終碧海平步忽青雲妙質歸陶冶良材
謝斧斤詞林先擢秀諫院早題勲身許南金價名空北
馬羣有生能念祖無飯或忘君學道心猶壯憂時髮半
皤剡舟如可載吾欲問江濱

當進大明會典禮畢有述

聖祖開基日神孫繼志成文哉周典制貽厥夏和鈞啓
簫納青簡函書獻紫宸命傳綸綍手官重股肱臣執玉
朝宗地冠裳報主身願俾經國理無處不堯仁

樓翠為刑部曹員外鏌父作

山遠平分翠樓高迴得秋暝隨歸鳥至清與故人留地
僻塵稀到雲輕棟欲浮林光新雨淨湖影夕陽收短笏
頻支頰重簾不下鈎畫姿疑淺着詩境入冥搜吏服終
同隱村居且當遊百年渾對此何必泛扁舟

懷麓堂集卷五十四

欽定四庫全書

懷麓堂集卷五十五

明 李東陽 撰

詩後稿五

七言律詩

樗老詩為蘓州楊翁仲實作吉士昇之父

雨露風霜共此身託名樗老意還真青黃幸免犧尊累
紅紫誰甘馬足塵地有山川開壽域天將歲月與閒人

養生已得蒙莊術欲向南華比大椿

送馬少卿宗勉得告歸吳

賦詩行酒送春裝贏得歸時滿路光
天上衣冠新賜紫江南丘壑再焚黃
親教暫去真殊寵不厭頻來是故鄉
共說鳳池恩露滿莫將毛羽挂搏桑

送蔣編修敬之歸省

宦游詩興遠相牽過盡荆山是越川
花外引輿因奉母月中鳴佩想朝天
雲霄健翮輕千里江漢歸心已二年

東望海南書札近幾時聽雨對床眠

內閣賞芍藥奉和少傅徐公韻四首

一春風日幾晴陰數種名花競淺深
禁苑栽培真得地化工雕刻本何心
叢疑月下留鸞宿香到人間許蝶尋
臺閣風流前輩遠綵毫重和玉堂吟

次第紅芳又綠陰好花留向玉堂深
多從雨過看生色不為春遲負賞心
清露著衣香易濕綵雲迷眼夢難尋
杯餘幸接韓公宴詞罷先賡白傅吟

曉聞花底佩聲歸萬葉枝頭露未稀力盡丹青空藻繪
眼看紅紫漫芬菲裁雲直傍瑤臺起避日須將錦障圍
願向人間分此種莫教春祇在彤扉

春逐長安檐上歸此花真覺眼中稀新題翰苑圖猶在
舊事揚州草自菲索賞向人心已醉試開經日手頻圍
欲知近侍承恩地長共西垣與北扉

題篁墩行樂卷二首

吟餘肩對碧峰嶢談罷風生玉麈髦一代才名幾蘇軾

千年宗派兩河南古來經籍多親勘老去江山亦飽諳
珍重文章與經濟眼中何地不君堪

與君意氣各聲名同向賓筵賦鹿鳴萬里雲霄容接武
老年詩酒尚關情墩前種竹乘春雨洲上尋芳愛晚晴
欲共舞雩真樂意江南新服幾時成

內閣五月蓮花盛開奉和少傅徐公韻二首

漫道西湖百畝寬新花尚怯曉波寒內園自合先芳意
道眼從來是別觀金掌溢時清露委水仙多處綠雲攢

人間不解真顏色却愛紅妝舞翠盤

兩池風物許平分新賞從來是舊聞空翠欲沾衣上雨
朵紅猶識殿東雲吟餘彩筆詩難就宴出芳筩酒易醺
紅杏碧桃今在否試將消息問東君

又和太子太保劉公韻二首

十分芳氣襲人清未羨蘭蕤更菊英盡去穠華還古淡
絕無言笑有風情根含瀛海波濤潤色藉天家雨露榮
見說中通能外直此心端合與花盟

天與靈姿絕代清，看渠真作水中英。
雲端別有栽培地，江上空多采掇情。
縱是丹青終屬幻，未經題品若為榮。
他年自許歸來樂，不結陶翁社裏盟。

次周吏部伯常得孫韻二首

生男最樂況生孫，萬事如公不要論。
千古并汾靈氣在，

四傳莊懿祖風存。

周乃翁尚書公謚莊懿

森森蘭玉非無地，袞袞

公侯似有源。從此直須稱相業，鄭同何止是專門。

桂花能子竹能孫，秀色清香取次論。
新綵預看堂下戲，

舊環疑指樹間存
雖生鸞鷟非凡鳥
水出瀛洲是海源
最羨西鄰多盛事
賀車終日過吾門

郊壇分獻得星辰

南郊類祀禮方殷
位重星辰迴出羣
萬象紛羅天四匝

兩壇高起夜平分

星辰凡二壇

名沾御筆親題字

內四壇皆親定服

識先朝舊製文

武舞服左袖畫干上有除暴安民四字乃洪武舊制近始服之

冠履一

時陪奠獻幸從燔燎託餘馨

候駕畢宿神樂觀

日華初滿殿東臺天路遙瞻步輦來夜賜鶴袍階二品

前日賜
同尚書

畫頒龍饌日三回

是日茶飯外
有特賜三

鵷鸞地煖和雲宿

虎豹關嚴待月開扈從兩朝今最近報恩何力盡凡才

重經西涯

晚風殘雨送輕寒傍柳隨花意未闌林鳥欲歸巢已換
釣磯如在水應漫青春荏苒催雙鬢黃閣棲遲愧一官
詩卷酒船如許載他時須作鑑湖看

文華紀事

弘治十一年九月初二日經筵
春坊亦開講車駕復臨幸焉

兩筵開共及嘉辰三度文華集講臣鶴駕暫停當殿午
龍顏一顧滿墀春經傳聖學淵源近地接天家雨露均
明日宮壺重拜賜願將涓滴報皇仁

次日有羊
酒之賜

送楊維立之南京吏部

學士官高少宰尊更將奇事與君論楊公清白多孫子
蘇氏文章好弟兄昆總謂留都非散地極知親擢是深恩
題詩合代持盃送為有通家舊誼存

重經西涯

朔吹晴沙卷暮寒舊時樓閣記憑欄層冰耐有行人度
愛日慚非稚子歡豈謂鳴珂還故里敢將華髮戀微官
人間未少閒丘壑欲作求田計更難

又

禁城陰裏御河西昨夜分明夢不迷樓外酒帘非舊館
沙邊屐印有新泥年華漸覺兒童老巢戶深懷燕雀棲
滿地虛寒霜月在敢忘燈火教詩題

東陽六歲時先君以詩命題手改結

句云明月滿天霜滿地清風時復送虛寒謹識于此

屠元勳侍郎奉使遼府因省母嘉興次傳禮部

韻

屢甸東關議北征暫違西署復南行宗藩使節君臣義
江漢歸舟日夜情滿路山花春欲動到門簷鵲曉先驚
遙知雋母承歡地應問官刑日幾平

趙給事士賢二親壽詩

買書種樹是良謀偕老人間不外求看到兒孫還滿眼
數將甲子更從頭太平時節有閒地真率會中無俗流

應共倚門瞻使節錦衣剛喜故鄉遊

郊壇分獻得北鎮

醫無閭

禮備牲帛尚玄茲山壇與嶽相連分幽已別虞州九
入向方歸禹服千名為北方長作鎮位當東面卻瞻天
憶從南海分壇後十二年中徧四延

春丁代祀孔子廟庭

弘治丁巳

殿頭天語下鴻臚壁水諸生掃舊廬春版署名書帝遣
夜盤分胙出神餘仰瞻地切高堅在陟降心勞左右如

三載黃扉今再命敢將遺澤負詩書

送董禮部尚矩還南京

望入鍾山紫氣高壯遊元不限風濤老看健骨如松節
俊識名家有鳳毛遠信憶傳新錦字交情貪飲舊醇醪
誰言省署寅清地不及經帷侍從勞

寄陳直夫

勇退西江是急流十年高卧越山秋眼明耐寫蘭亭記
興到耽為剡曲遊人識桓郎冠上多栽慙弘景畫中牛

新詩賦得遙相壽正及斑衣戲白頭

寄和劉亞卿時雍二首

時劉督餉北邊

曉聞邊報入官衙夜整朝衣對燭花
四牡馳驅方得路一身羈泊本無家
新霜漸覺頭顱改升斗真愁國計差
何似東南分省地十年三泛海邊槎

使車停處即開衙又見邊庭雪作花
王事有勞寧歎我匈奴未滅豈論家
周田近報千倉滿漢將虛傳六級差
但得營門歌飽士不須天外羨乘槎

次韻答沈都憲時暘二首

玉堂飛雪白於麻，貝闕瓊樓世漫誇。
萬樹恩光同上苑，一簔歸興已長沙。
因懷赤子常憂國，未滅匈奴敢問家。
遙愧大夫持漢節，詩成何處詠皇華。

誰道鷹鷂異鳳鸞，外臺風采似朝端。
須教道上人驚典，復遣軍中帥有韓。
民力到頭如欲竭，忠言入耳諒非難。
江山歲晚巡行地，應謝風霜滿豸冠。

寄方石先生附王存敬知府

病來偏覺宦情疎，病起依然是故吾。
支俸籍存經月住，買山囊在一錢無。
舊時經濟慙書卷，老去山林想畫圖。
若見王郎煩問訊，廟廊終不異江湖。

體齋以禮部侍郎兼學士入掌詹事府以詩賀
之用舊所賀韻二首

當年十八共登瀛，公在朝廷最老成。
翰長宮端同日拜，世間天上幾人并。
經帷久輟班仍在，吏牘全拋夢亦清。
早向賓筵沾賀札，已慙疎拙負平生。

詞林地近接宮坊又領青雲白鷺行周代孫謀方子翼
傳巖家學本臣良前星照夜天垂彩儀鳳來時國有祥
未論台階和鼎鼎載看經幄講虞唐

候送青谿先生考績南還坐間有作

餞送經年不出城一尊相對是平生玉堂燈火三人在
建業山川兩度行無計挽留慚我劣有懷撐塞為君傾
水雲亭上蕭然坐撚斷吟髭句未成

讀虞邵菴詩

少陵門下多蹊徑五百年來見幾人久矣不聞空谷響
時哉羞效捧心顰真仙混世元無迹老將藏鋒却有神
擬抱朱絃携白鶴青城山下看嶙峋

讀劉靜修詩

百年四海一容城是處雲山著脚行觀物每從真意得
感時翻覺壯心驚高松絕島凌秋勢獨鶴空江驚夜聲
多少中原詞賦手盡將絲竹奏升平

松崖戴司寇遣子入塾圭峰董禮侍有詩次韻

一首

生男向晚望增年，慰意頻過几杖前。
未向青雲誇接武，已將黃卷學從先。
漢都客有東西賦，戴禮家應大小傳。
同榜故人須世講，曲江春柳看垂鞭。

寄方石二首用所寄韻

老來風節重於山，獨立顏波萬頃間。
滿地江湖雙客鬢，十年名教兩賢關。
鳳儀快覩虞廷近，龍卧難容洛水閒。
曉日橋門佳氣裏，白袍東望正連班。

門前流水屋頭山十載逃形向此間
要識行藏皆在我
久知貧病不相關
青松萬木風霜老
野渡孤舟歲月閒
聖主分明知姓字
未應巢許得同班

卜居一首東南屏

日下園亭秋氣陰
故人相見暫開襟
買田陽羨蘇公計
客舍并州賈島心
老至尚誇詩力健
病回猶怯酒杯深
歸來漫作燈前話
却喜妻兒是賞音

用韻答邃菴

嶽麓峰前湘水陰
思歸無計豁煩襟
亦知吳越非吾土
未必功名是我心
地上青山隨處有
鏡中華髮逐年深
故人只在鄰州住
空谷他時聽足音

用韻答邵國賢

種樹長安不作陰
幽居何處解冠襟
間逢北客論山價
老向南枝識鳥心
江水縱平終是險
惠風雖好未為深
祇應棹入荆溪去
遙聽吳歌答楚音

用韻答吳編脩克溫三首

話久西窻下夕陰喜逢南客共被襟楚人不作將歸賦
王翰真勞願卜心長為卧遊思地縮却因行樂愛山深
濯纓正起滄浪興不道中流有和音

坐愛林居水竹陰百年風月此開襟重闌桑梓經行路
故壑松楸去住心燕市不如吳地暖荆溪合似楚江深
春天定有南來鴈須為山靈報好音

常州予先祖母舊
里先祖亦嘗遊寓

其間
故云

渭陽人在玉堂陰曾向齋廬話宿襟綠野莊前成故事

西州門外識君心
兩畿風土無南北
四海交情有淺深

他日到時須掛劍
寂寥風樹想遺音

謙齋徐公吳舅也
常聞于此論書未

達而計至故於
未篇有感云

九日盆菊盛開將出郭有作

買得長安擔上秋
南山只在屋西頭
花開正好逢佳節
身病那堪復遠遊
昨夜月明空對酒
晚來風急怕登樓
多情重有燈前約
為報花神作意留

月下賞菊限韻東邃菴太常先生

不隨春蝶夢滕王又送秋蟬過綠楊佳客到時非舊雨
好花開處亦重陽為園恨少青山地插帽羞看綠鬢郎
長對此花還此客縱教多病也身康

用韻與王太僕公濟

花邊忽見白衣王月上陶門已綠楊獨酌未須愁太白
長生休更問南陽元知楚國離騷手不是玄都去後郎
擬向清陰掃白石一琴重與坐嵇康

用韻與喬希人郎中

莫向蘭亭羨二王杏園前輩憶三楊

三楊有杏園雅集

我家勝

會還花底之子才名亦晉陽晚節正須開老圃幽姿且

合對清郎因懷二十年前事九日扁舟下建康

再用韻示兆先

莫倚家風比謝王正須立雪似游楊侯門有意迎彭澤
對景無家憶漢陽池館可栽非少地父書多讀勝為郎
書香亭上黃花節且共重闌樂壽康

十月賞菊體齋席上限韻

與楊太常王太僕同會

尋芳何意到君家
雨過高城少暮沙
此夜幽歡還月下
去年孤館各天涯
狂思晚節曾吹帽
壽擬春期及進瓜
體齋壽辰
在二月
不是老來詩骨健
誰能白髮對黃花

寄姜用貞

此身隨處得從容
一葉扁舟九節筇
書到帝京緣索藥
手開山徑為栽松
海邊遺愛生祠在
天外遙心別路重
同榜少年頭漸白
憶君何地更相逢

戴松崖司寇省墓饒州

鶴袍犀帶尚書貴畫錦堂中見幾人身向九天承雨露
步隨雙履下星辰西堂夢後吟生草南澗歸時薦有蘋
應憶舊都棠樹裏豈無枯朽待陽春

青谿先生新領留參之命奉寄一首

留司勅下拜新參道路皆言寵命堪龍虎地高蟠左右
斗山名重壓東南百年士馬中原盛一代儀章故老諳
欲為太平根本計豈將勲業付高談

寄顧天錫二首用致仕後所寄韻

休將白髮論公私造物何曾有點癡
閱盡烟雲雙眼在嚼殘冰蘖寸心知
遺珠在澤終成媚倦鳥投林大未遲
獨有懷賢兼感舊春來無日不君思

愛畫耽詩是我私傍人休笑虎頭癡
誰將綠綺更新調祇許青山作故知
樓上月高憐夜永水邊花冷恨春遲
并州無限江東路却望停雲有所思

次韻答方石先生三首

兩函恩命一年并林下依然識聖情
白髮有身應許國

青山無路可逃名心同隱逸官何累世重師儒道亦榮
行路總難休漫道有時歌側有時平

為國懷賢兩意并公應於我未忘情拔茅已慰朝端望
附驥方慙榜下名少室載徵唐李渤安車終起漢桓榮
霞城碑兀高千仞祇恐胸中未易平

一家三世客幽并萬里沅湘日夜情未老桑榆先暮景
本無根蒂尚浮名買將山去終成拙乞得湖歸始是榮
擬住江南訪東越台江風浪幾時平

重經西涯

禁城東去復西回
又見遙山紫翠堆
酒盡不知紅日下
詩成剛被黑雲催
慈恩有寺曾遊白
綠野無堂正憶裴
淚滿密縫衣
上線渭陽風景更徘徊

郊壇分獻得星辰一

弘治庚申

星壇東望隔重城
複道西來步月行
萬里烟雲春散斂
一天經緯夜分明
山河地迴非塵界
金石聲高徹太清
分薦禮成頻拭目
盛時方仰泰階平

祀畢喜晴次屠吏部韻

水輪西下漸經申玉漏南來早報寅九宇空寒消霧露
一壇芒色動星辰龍光下燭天應鑒義馭前瞻日已賓
大明壇在星辰上人日向來晴到穀帝城先卜萬家春

雪後經西涯

雪滿平湖玉鏡開更無波浪與塵埃凌空海鶴遙應度
照影沙鷗却自猜豪客園池非舊業梵家宮殿有高臺
林花苑柳如相識又是春風一度來

成國朱公宅觀料絲燈次周司徒屠太宰韻

節假承恩憶退公
夜堂燈火儘相容
疑成天上絲綸手
不是人間剪刻功
索價想應輕萬鎰
留歡剩欲倒千鍾
似聞賦客多奇賞
直自山西到浙東

白巖圖為喬郎中題

三峰矗立當重樓
主人舊住西南州
絕壁倚空千丈雪
過雲回首萬山秋
河陽參軍馬前望
長白老翁天下憂
丈夫事業合如此
須遣振衣來上頭

重經西涯

缺岸危橋斷復行
野人相見不通名
轆轤聲裏田田水
楊柳枝頭樹樹鶯
看竹東林無舊主
買山南國有新盟
不知城外春多少
芳草晴烟已滿城

寄陳方伯同年

少時曾共曲江遊
解組還家未白頭
種得棠陰人勿剪
寄來書札手親修
閒身好付三江水
健步猶堪百尺樓
寄謝壽筵詞賦客
不須圖畫寫扁舟

題林吏部像二首

緋袍金帶映清盧，好是天門聽漏圖。
人物兩京新藻鑑，衣冠六館舊型模。
憂勤許國身猶壯，清白傳家德不孤。
縱道丹青能貌得，不知能貌此心無。

閩山秀拔越溪清，共識扶輿早降精。
父子一門同甲第，春秋三傳有諸生。
天涯不隔春明路，堂額新題畫錦名。
曾是紫薇花下伴，為公瞻送不勝情。

月林為倫修撰父處士作

入林華月夜還生別是詩家一種清流水青蘋空詠影
陰巖靈籟不聞聲鶯花上日春無賴塵土東華夢未成
報道仙郎真折桂始知天上有人行

中秋獨坐

一年風物愛秋晴獨向空庭坐月明萬里山河皆在眼
異鄉兒女正闌情燈前有夢難歌枕客去無心自舉觥
高閣捲簾過夜半不知涼露濕冠纓

十六夜不見月與成國內弟遂菴太常并顧編

修士廉陳御史德卿喬郎中希大共話用前韻
簾外輕雲薄晚晴一燈當坐夜偏明秋光有意隨人約
月色無端也世情習隱尚懷田二頃消愁直放酒千觥
微吟細語能相慰老淚何須更濯纓

得兆先舟中書用所贈楊給事韻二首

別後偏憐見面難詩來長是借人看遠書信抵千金重
老夢真成一夜安總為天倫關骨肉極知人事有悲歡
向時宦况休勞問依舊端居與素餐

生年容易別時難猶記回頭忍淚看魯地山川連闕里
杜家兒女憶長安園林過眼驚時序道路逢人強笑歡
無限歸心書一紙為渠三復罷晨餐

送成國內弟之留都二首

兩朝恩命重留都父子分符世所無督府門開新綵戟
賜弓家有舊彤盧巡江令下秋霜肅望闕心懸夜月孤
傳得蓋公堂上教本知清靜是良圖

秣陵城夜公留我郭隗臺秋我送公南北宦途千里別

死生交誼兩家同
潘輿愛擁花間日
名笈聞歌樹底風
高閣賦詩餘興在
不勝翹首望飛鴻

竹逸

少年種竹已成翁
贏得閒身向此中
舊業不嫌三徑少
醉遊聊復五人同
青鞵夜踏沙頭月
紗帽涼歌葉底風
莫道老夫無一事
短吟長嘯幾時窮

重經西涯

秋氣澄清天宇高
一林霜葉晚蕭騷
黃花節近無風雨

碧水潭空盡羽毛頻筭老時驚歲月難忘情處是兒曹
卜居未定居仍卜薊北天南兩意勞

九日雨中作

丹鳳城頭鴈已南雨聲催仗放晨叅宮衣盡濕恩兼重
御酒微醺興亦酣芳草綠時憐野色菊花開處憶江潭
高樓西望休回首泗水齊山總未堪

九月十日得兆先消息疊前韻

小閣簾開月正南壯懷秋興兩相叅平安欲報心先喜

故舊相逢氣已酣東望有山連岱嶽北人多夢到湘潭
向平嬌嫁應粗了獨是離情尚未堪

再得兆先書用前韻

第二書來見轉難一緘渾作幾迴看歸遲可待頻經月
別近猶煩遠問安硬欲登山知汝健苦教留飲為誰歡
愁腸百結無端緒多在晨炊與暮餐

別母何如別妹難歸時翻作去時看山川路遠那能盡
骨肉情深兩未安高閣雲烟勞望遠舊堂甘旨待承歡

遙應月白燈青夜細說風行與露餐

與表兄殷通府話別二首

十載重逢鬢欲皤問君官況定如何
山厨夜煮吳粳飯水驛時聞越棹歌
列縣民貧勞撫字故園家近喜經過
休言不是西堂客若比西堂夢更多

君尚紅顏我已瞠我年差小奈君何
未窮元禮通家話且和玉郎拔劍歌
華館夜看燈影靜碧天晴數鴈行過
老來亦有江南意一度相逢一倍多

元旦試筆

曉從天闕賀春回
晝掩幽堂避客來
書卷總拋心未了
園亭雖閉手還開
占年稍喜逢新霽
報國終慙是薄才
莫笑卜居居不定
江南松菊便須栽

郊壇分獻再得星辰一

聖朝郊祀合園方
又見分壇帝座傍
天上有文成五緯
人間何地不三光
制傳幽榮從周禮
歌罷重輝協漢祥
俯仰直教無愧怍
共將精白助君王

分獻次青谿太宰韻

時青谿分得星辰二是日立春

星壇對立本聯班
複磴憑空不易攀
良久夜方移斗柄
早時春已到人間
朱旗影隔天門靜
玉佩聲隨閣道還
舊日同年今並命
共從光霽識威顏

答體齋宗伯用前韻

時體齋分獻得北岳是日免賀春禮

春日逢恩早放班
瑤壇盡處許同攀
星辰位切瞻依上
山嶽神疑陟降間
天路曉陪仙仗立
齋宮晨領奏章還
是日禮部有奏疏
終慙典禮寅清職
賸有賢勞答聖顏

慶成宴次前韻與青谿

紫殿東頭共一班
台階高處得追攀
煖風晴日融和際

舊寵新恩坐立間

青谿舊為禮部例常
立侍今歲始復坐

七載東垣慚我

在五年南國望公還
擬陳幽樂當周宴
一笑相看漫解顏

次韻答方石祭酒病中見憶

廟祀郊齋籍未通
靜聞神語應歌工
閒不廢春懷友
身病猶煩夜在公
壯老遽催年歲改
飛棲雖異羽毛同

極知宦況從來薄，獨有豪吟興未窮。

蕭海釣寄蠋黃上元日出以饗客因賦一首

薄筵無物薦清宵，黃蠋分香味頗饒。
腥帶海風崖際出，凍隨春雪酒邊消。
東關地僻勞相寄，南客方傳始解調。
不有可人佳賞在，一春詩興又蕭條。

次謝方石歸來園韻

又向長安憶故園，白頭歸興此終存。
長留舊屐供山水，旋買新書寄子孫。
樓上元龍曾卧許，社中司馬未封溫。

獎恬激懦清朝事廊廟山林總是恩

春興八首

塵沙無日不春陰伏枕偏驚抱病心憂國暗催青鬢改
避名翻愛碧山深水禽聲動寒猶咽風柳條長弱未禁
客去客來門自掩老夫渾欲謝冠簪

柳絲花片滿芳洲長為溪山感舊遊急雨過窻醒短夢
驚風入樹攪離愁歸帆欲掛三江水病脚難登百尺樓
老去不知春興減向來一月罷梳頭

高歌曾扣隔江船
楚泛吳遊興渺然
山寺夜鐘眠裏月
洞庭春水坐中天
翠籠鸚鵡空愁思
碧海鯨魚幾歲年
一語故人三歎息
始知清廟有朱絃

病懷愁緒冗難裁
空望單于萬里臺
月落平沙南鴈下
雪殘荒戍北花開
關山遠帶風塵色
閭幄誰當節制才
胡馬不肥春草細
過河消息幾時來

六年書詔掌泥封
紫閣春深近九重
堦日煖思吟芍藥
水風香憶種芙蓉
登臺未買千金駿
補袞難成五色龍

身病益愁愁轉病老來歸思十分濃

帝城芳意入春濃快馬輕車處處逢宮樹巧藏鶯百轉
苑雲深護月千重愁來擬斷杯中物病起還支石上筇
得似玉堂風月地少時遊賞幾從容

甕山西望接平坡

寺名

疋馬雙童幾度過十載衣冠朋舊

少五更風雨夢魂多湖邊漁榜驚鷗鳥樹裏僧房隱薜
蘿飛盡桃花還燕子一年春事竟如何

小疊峰巒淺作池幽堂長是見春遲風傳翠篠聲先到

雨換青松葉未知江上帆檣經幾駐城南第宅已三移
君恩若放山林去始是雲霄得意時

再次歸來園韻

十里青山二頃園古風依約此中存封胡有子還諸謝
李孟何心復兩孫新席坐來猶未煖舊盟寒盡幾時溫
請看百世詩書澤總是當年節婦恩

懷麓堂集卷五十五